



Il trio Heavy Tools.

MAD

18avel Top Pop Rumantsch: Novas undas da Schons

■ (cp) Per l'emprima giada vegn il Top Pop Rumantsch or da la Val Schons. Casper Nicca e sia gruppa Heavy Tools sentan la «Plievgia tgòlda»: Ina chanzun per la proxima stad.

La musica era per Casper Nicca gia adina in pau en l'aria – ils onns '80 passava quella cun las undas dal famus Radio 24 tras la Val Schons. Ed in bel di han ils tuns tschiffà il giuvenot ed al purtà or per il mund enturn. Magari a sunar in pau saxofon en ina band da la Bassa. Ditg suenter il return ha Casper scuvert la ghitarra. E cun quella la vigur dals lungs artgs musicals a la moda

da Neil Young u Van Morrison. Impurtanta saja però l'entira band Heavy Tools ch'ha accompagnà quella nova partenza, accentuescha Nicca: René Zimmermann al bass e Patrizia Caviezel a la batteria – els fan la punt als tuns pli moderns. Betg uschè simpel saja i stà da chattar la buna lingua per cantar en rumantsch, damai che ses sutsilvan na saja betg il pli «schuber», conceda il nov rockadur. Tuttina ha'l entupà ina bella «plievgia tgòlda» da stad, ch'exprima la ballabaina «tranter inamurar e bandunar, tranter sgular ed ir a pe», En ina chanzun simpla ed ure-

gliabla che marca oramai il 18avel Top Pop – exclusiv sin Radio Rumantsch.

Casper Nicca è naschì il 1968 a Donat en Val Schons. Suenter studis da scolast ed in segiurn en America ha el manà onns or in affar da musicalias a Winterthur. Turnà en Schons ha el lavorà in curt temp tar il Radio Rumantsch, oz è el mainafatschenta da l'associazion regio-Viamala. Patrizia Caviezel e René Zimmermann, ch'èn 10 onns pli giuvs, ha Nicca entupà en Val Schons, ella sco anteriura pura da Donat, el propi sco lavurer lainari. Ensemen furman els dapi 2008 il trio Heavy Tools.